

November 13, 2013

Waar my belangstelling in genealogie vandaan kom en hoe dit gekom het dat die belangstelling tot 'n P.hD gelei het?

Dr Marthinus J S Jordaan

GGSA Vrystaattak,

Vroue Monument Bloemfontein

13/11/2013 19.30 45 min

President van die GGSA se Vrystaat tak, lede en nie lede baie dankie vir u uitnodiging om u toe te spreek Ek is terdee bewus van u entoesiasme en ywer warmee u die tak bestuur veral in die lig dat ekself in die 1990's president van die tak was.

Die versoek aan my was tweeledig

eerstens

Waar my belangstelling in genealogie vandaan kom en hoe dit gekom het dat die belangstelling tot 'n P.hD gelei het?

en tweedens

Is daar 'n verskil tussen genealogiese navorsing van die gewone persoon en die van 'n persoon wat dit doen vir 'n akademiese kwalifikasie?

Iemand sou ook kon se genealogie versus akademiese navorsing?

.....

1

Waar my belangstelling in genealogie vandaan kom en hoe dit gekom het dat die belangstelling tot 'n P.hD gelei het.

Hierdie vraag het my regtig laat dink waar en hoe het dit wel begin dat die genealogie my stokperdjie sou word met vele ander betrokkenhede...

November 13, 2013

As ek terugdink voel ek nog hoe dit voel as seun onder tien hoe dit was om in my oupa en ouma Jordaan of soos ons kleinkinders gese het oupa Primgradia se portaal in te stap nadat jy by die plaas se argivale statistiek op ysterklip by die voor deur verby gestap het oupa en ouma gesoen groet het en dan elke keer opgekyk het na die familie wapen asook die foto van ons vier geslagte wat geneem is na my geboorte Die foto het ook in al die ooms en tannies se huise gehang. Ek was ook van kleins af beuws dat ek na my oupa vernoem is net soos my Pa na sy oupa vernoem is so die Jan Hendrik en Marthinus Johannes Steyn kom al sewe geslagte. Ek het ook altyd gehoor hoe groot agting my grootjie vir pres Steyn gehad het dat hy my oupa wat in vorige geslagte net mj was die Steyn as derde naam bygevoeg het .My jongste seun is dus nou die derde geslag mjs...ons is vier neefs wat na my oupa vernoem is...vandag is dit net twee seuns in die nuwe geslag wat die jh en mjs dra.

*Plaas Primgradia se voorportaal ..familie wapen, vier geslagte, [die plaas naam het ook dikwels n Latynse kinkel gekry as daar oor die naam gepraat is](#)

*gedoop 1955 met water uit Jordaan rivier,

*die saambindende verhouding van my familie

* my broer en neef Jean en Pierre

* veroorsaak dat ek bewus van Hugenote afkoms

* in Engelse/ Duitse gemeenskap groot geword en derhalwe kwaad geword as ons Afr mense Dutchmen na verwys was

* as voet nota moet ek dalk se dat geskiedenis op skool my lekkerste vak was

* my diensplig 1974 en veral eerste jr 1977 in pta het die Franse afkoms bewus making geprikkel/ stumileer..iets soos n Franse rest in pta

* omgewing van 1979 het my pa se broer de Villiers se boek in Kaapstad ontdek en van die Jourdan/ Jordaan gedeeltes vir ons afdrukke laat maak en laat bind. Die onvolledigheid van die voor die handliggend ontbrekende name het waarskynlik n uitdaging wakker gemaak.

* na ons troue in 1987 help my vrou dat ons die Jourdan/ Jordaan bloedlyn van 1688 tot met ons troue op datum kry..sy het dit spes op rys papier uitgele

* toe kom 1988 en die herdenking vn die 300 jr koms van die Hugenote hierdie jr vier ons die 325 ste herdenking.

* 1988 sou verskeie leemtes in die Jordaan gesk uit wys of in my geval n diepe bewus wording stimuleer

* tydens ons wittebrood Junie 1987 het ons n aand by n AA hotel in oos tvl gesl en so twee mde later kry ek n oproep ..ons het n lucky draw gewen het in enige aa hotel...dit het veroorsaak dat ons die prys tydens die Hugenote fees in April 1988 benut het in die wes Kaap bygewoon het

November 13, 2013

*met die opstel van ons bloedlyn het ons n sg missing link gehad van n voorvader en die se vrou...na n lang soektog kom ons toe agter die voorvader het drie vrouens gehad en die missing link was die derde vrou waaruit ons bloedlyn sou voortspruit se laaste kind (sy tiende).

*gedagtig dat so onlangs soos die laat 80's vroeë 90's daar nog nie rekenaars was nie maar wel tikmasjiene ...die gevolg was soos van u dalk sal onthou het n mens maar soos die name meer geword het tik papier met die vetakkinge teen jou gang muur begin plak

*my eerste sagteware program was Brothers Keeper in 1991 ...ek hom gebruik tot by 3500 name toe begin die program tekortkominge uitwys

*dit word ogevolg deur n Stellenboche program Genea waarin die 3500 name oorgetik moes word en ons kon vorder tot 8500...hier het die program ook sy tekortkominge begin uitwys waarvan een was dat n DOS gebaseerde program was en nie Windows.

* so word ek voorgestel aan Family Origins in ongeveer 1996/7 Toe was die mees gevorderde FO ek dink 5/6 wat intussen opgradeer het tot FO 10 waarna die skrywers die opdatering gestaak het

* die eerste druk van gen reg van die Jordaan famiie met 33 028 name is met behulp van FO 10 en GEN 2SA em Mword gepubliseer in 2005...April 2011 was die agste druk oplaag

* wat die tweede uitgawe sal wees in die toekoms trek ek tans by 10 505 name by die 33 028 =43 533 name ..in teorie het ek gedink met 2000 Fb vrinne op die Jordaan blad en elkeen wat 20 nuwe name deurgee dit n add 40 000 by bde huidige 43 400 name kan voeg ma w 75 000 name hierdie teoretiese droom blyk nie water te hou nie

*ek moet net se my GEN2SA program stol op dieselfde plek wanneer die besig is met die vertaling van die inligting date k nie weet hoe ek gaan maak wanneer ek die 2 de uitgawe wil publiseer nie. Een van die opsies is om die Afr weergawe van Legacy te gebruik...dit voel soos n berg voor my om sukselvol te migreer van die een pr na ander sonder om info te verloor.

Dit kortliks sover as wat die genealogiese gedeelte van my lewe aan betref.

2

Is daar 'n verskil tussen genealogiese navorsing van die gewone persoon en die van 'n persoon wat dit doen vir 'n akademiese kwalifikasie?

Waarskynlik is deels van die mootlike verwarring rondom die vraag ..

Is daar 'n verskil tussen genealogiese navorsing van die gewone persoon en die van 'n persoon wat dit doen vir 'n akademiese kwalifikasie?...is dat ek na 18 jr se genealogiese werk in 2005 die Jordaan register pub het dieselfde jaar wat ek my proefskrif ingedien het .

November 13, 2013

Nadat ek my proefskrif ingedien het waaraan ek van 2002-2005 gewerk het was daar n drie mde wag tydperk om te hoor of jy wel slaag al dan nie. As ek reg onthou was daar vier eksaminatore. Die spanning en blote wag vir die uitslag is nogal n tydperk om te beleef. In die tyd besluit ek toe om my aandag weg te neem van die spannings volle tyd ek die genealogiese register gereed kry vir die drukkers. Die gevolg was die register was gedruk voordat ek my uitslae gekry het.

Hierby die toestemming wat ek by UVS gekry het om die proefskrif in boek vorm te publ..aanvanklik met dieselfde naam en later

Van Cabrieress D Aigue tot Cap de Bonne Esperance

So ons praat eintlik van drie pub in een kwartaal.....

.die proefskrif se titel is

Die Jordaan-familie : 'n historiese ontleding van hulle genealogie en die vestiging van toerisme roete

Die ses hoofstukke se titels is

- 1 Die Jordaan-familie: Was hulle Waldensers of Hugenote ?**
- 2 Die VOC; 'n bevrydingsaanbod vir die Jourdan-familie na die Kaap de Goede Hoop en die Jourdan-broers se vestiging in die Drakensteinvallei (Oliphants Hoek)**
- 3 Die verspreiding en eerste ervarings van die Jordaan-familie in Suid-Afrika sedert 1741**
- 4 Die debat oor en die ontwikkeling van kultuur, erfenis en kulturele erfenistoerisme binne en buite die land se grense, 1985-2004**
- 5 Die Jordaan-familie se multi-kulturele erfenis: hulle bydrae tot en invloed op genealogiese, kultuur- en erfenistoerisme en die daarstelling van spesifikasies vir 'n kulturele erfenisroete**
- 6 Kritiese drempels vir die kulturele erfenisroete van die Jordaan-familie**

November 13, 2013

Indien u my

akademiese lewe wou opsom om deels by die vraag se antwoord te kom sal u vind dat dit kripties soos volg lees...

studeer natuurbewaring en bestuur, hoer dipl in naskoolse onderwys en M met onderwerp kurrikulering vir die opl van toerisme bestuurders, deelyds klas gee by albei plaaslike universiteite en ook betrokke as ondermeer eksterne moderator vir verskillende vakke. Advies komitees ens. Verskeie publ / referate sien ook die lig met verw na die toerisme bedryf.

werks ervaring gemengde boerdery, natuurbewaarder, toerisme bedryf in verskeidenheid hoedanighede ondermeer assistent bestuurder, raadslid en wne HUB. Was in 1992 n benoende vir die BFN van die jaar

* u is sekerlik bewus van al die voorgraadse kursusse waar een lei tot graad/dipl, hon, m in verskillende fakulteite, PhD ens, post doktoraal

* groot onderskeid tussen Hugenote as groep en die Jordaan familie as universum

Inleiding

Daar bestaan verskeie publikasies oor die Hugenote. Talle van die publikasies handel oor die geloofstryd wat die Hugenote in Frankryk gehad het en ander werp weer lig op die Hugenote aan die Kaap. Die werklikheid is egter dat daar weinig, indien enige, verwysing is na die Hugenote in familieverband. Hierdie realiteit het hierdie navorsing geweldig bemoeilik en sal ook soortgelyke studies in die toekoms bemoeilik.

Die enigste publikasies wat wel na die Hugenote in individuele verband verwys, is dié oor die passasierslyste van die VOC-skepe asook dit wat handel oor watter Hugenote plase in die Drakensteinvallei ontvang het.

Dit is deels die uitdaging van hierdie navorsing, naamlik om die koms van die individuele Hugenote na die Kaap uit te beeld. In hierdie geval is dit die uitbeelding van die Jordaan-familie.

November 13, 2013

Suid-Afrikaanse historiese literatuur word in familieverband verteenwoordig deur onder meer biografieë, outobiografieë, 'n verskeidenheid romans, verhandelings en proefskrifte oor individue, talryke genealogiese registers en hoofstukke of gedeeltes daarvan oor 'n spesifieke individu of groep individue wat betrokke was by byvoorbeeld 'n slagveld, politieke partye, ensovoorts. Hierdie navorsing is die eerste studie oor 'n familie as universum in Suid-Afrika. Hieruit vloei voort nuwe en persoonlike standpunte, wat 'n nuwe proses tot gevolg het in terme van die kulturele erfenis nalatenskap van 'n familie.

'n Verskeidenheid vrae moet beantwoord word, veral hoekom daar byna nooit na die Jordaan-familie verwys word wanneer daar na die Hugenote verwys word nie?

In die lig hiervan sal die studieveld begin met die stryd van die familie in Europa om die Protestantse geloof met die Waldensiese beweging as vertrekpunt. Die betekenis en oorsprong van die naam Jordaan sal ook vasgestel word. 'n Voorgestelde genealogiese toerismoete sal bespreek word wat die goue draad tussen die geskiedenis van die Jordaan-familie, genealogie en toerisme sal aandui.

Dit is noodsaaklik omdat daar byna geen spesifieke bron is wat as basis vir die studie kan dien nie. Uit 'n historiese oogpunt sal gepoog word om 'n verband te kry tussen die verskillende fasette wat nou gemoeid is met die geskiedenis, kerkgeskiedenis, Waldensers, die Jordaan-familie, genealogie, Hugenote en kulturele erfenistoerisme. Daar word nuwe en onbekende terreine verken. 'n Uitgebreide kennis van genealogie en geskiedenis, sowel as toerisme, was nodig om die studie suksesvol uit te voer. Die navorsing lê klem op die verband tussen die geskiedkundige gebeure en kulturele en erfenistoerisme. Geen soortgelyke studie is nog hieroor onderneem nie, daarom is die studieveld oorspronklik en kon daar slegs op enkele sekondêre bronne staatgemaak word. Dit beteken dat, afgesien van die beperkte bronne oor genealogiese toerisme, daar 'n beleid vir genealogiese toerisme geformuleer sal moet word van die. Nuwe inisiatiewe is nodig om hierdie aspekte aan te spreek.

Die navorser fokus eweneens op die analise, interpretasie en rekonstruksie van die invloed wat van die verskillende tydperke uitgegaan het. Die studie word tematies en chronologies aangebied, soos deur Geskiedenis as wetenskap vereis.

November 13, 2013

Hierdie studie bevat 'n besondere uitdaging wat die navorsingsmetode betref. Dokumente in argiewe, meesterskantore, aktekantore, bronnensentrums van die Hugenote Vereniging van Suid-Afrika en die Genealogiese Instituut van Suid-Afrika, Genealogiese Vereniging van Suid-Afrika, asook *Heimat* Museums in Duitsland, Waldensiese bronnensentrum in *Torre Pelicce*, *Musée de Desert* en die Protestantse Biblioteek in Parys is bestudeer om 'n getroue weergawe van die geskiedkundige gebeure te gee.

In korrespondensie en gesprekke met lede van die Jordaan-familie tydens die saamstel van die Jordaan-genealogiese register het die navorser onder die indruk gekom dat daar lede van die familie is wat nog nooit van die Hugenote gehoor het nie. Ander se kennis is beperk tot die bewustheid van hulle Franse agtergrond.

Die bergplekke van die tersaaklike bronne is wyd verspreid. Om die verloop van die geskiedenis van die Jordaan-familie te ontrafel en weer chronologies saam te voeg, was dit nodig om inligting te bekom sedert die derde dag van die skepping en spesifiek in die omgewing van die Jordaan-rivier wat begrens word deur verskeie lande, onder meer Israel. Daarna moes *Heimat* museums in Duitsland besoek word om die verloop van die Waldensiese beweging te verstaan sowel as die biblioteek en museum van die Waldensiese Kerk in *Torre Pelicce*, die *Angrognia*-valleie in dieselfde omgewing, asook gedeeltes in Switserland waar daar konsentrasies van Waldensers was. Hierna was dit nodig om die *Luberon*-vallei in die suid-ooste van Frankryk te besoek wie se geskiedenis nou aansluit by die van *Torre Pelicce*.

Om die Hugenote-beweging se geskiedenis en stryd te begryp, was dit nodig om die *Cevern*-gebied in die weste van Frankryk te besoek, asook die interpretasiesentrum wat ook dien as 'n museum aldaar. In kombinasie hiermee was die besoek aan die Protestantse Biblioteek in Parys van onskatbare waarde.

In Suid-Afrika is van die provinsiale argiewe en meesterskantore besoek om die meer as 3 600 sterftetekennisse van alle geregistreeerde sterftes van lede van die Jordaan-familie te bekom. Meer as 3 400 vraelyste is gepos in 'n poging om genealogiese inligting van lede van die Jordaan-familie te bekom. 'n Geregistreeerde e-pos en internet-tuisblad wat 'n aanlynvraelys insluit, is

November 13, 2013

gebruik om op moderne wyse kontak te maak met lede van die Jordaan-familie regoor die wêreld.

Die oorgrote meerderheid van die bronne wat gebruik is in die vorm van boeke, verhandelings en proefskrifte is aangevra by ander akademiese instellings in Suid-Afrika. Daar is by verskeie geleenthede in die Sasol-biblioteek van die Universiteit van die Vrystaat gevind dat bronne in artikel- of boekvorm as vermis aangegee was.

‘n Bronnelys is saamgestel uit 973 bronne. Dit sluit in ongepubliseerde argivale bronne, ‘n persoonlike versameling van inligting, videomateriaal van buitelandse bronne wat onverkrygbaar is in Suid-Afrika, transkripsies van onderhoude, ‘n verskeidenheid korrespondensie, buitengewone staatskoerante, wette, dag-en weekblaaie, pamflette en nuusbriewe, tydskrifte, gepubliseerde artikels, boeke, historiese werke, referate, verhandelings en proefskrifte, genealogiese registers, en internet tuisbladsye.

Europa is gedurende 1995 besoek op ‘n genealogiese toer en die meeste van die tersaaklike navorsingsinstansies was aangedoen. As aanloop tot dié doktorsale studie is reeds sedert 1987 aan ‘n genealogiese studie van die Jordaan-familie gewerk. Hoewel hierdie genealogiese register nie volledig by die proefskrif geïntegreer kan word nie, sal sekere van die gegewens wel gebruik word. Afgesien van die derduisende kilometers wat sedert 1987 in Suid-Afrika afgelê is om die register te voltooi, het die navorser ook tydens 1995, 9 500 kilometer afgelê op ‘n genealogiese toer in Switserland, Oostenryk, Italië, Frankryk, Spanje, Duitsland, Nederland en België.

Tydens ‘n geadverteerde byeenkoms van verskillende Hugonote-families in Franschoek gedurende April 1988 was die navorser en sy vrou die enigste besoekers tydens die Jordaan-familiesaamtrek soos geadverteer. Die organiseerder van die Jordaan-familiesaamtrek het self nie opgedaag nie. Die navorser het die organiseerder geskakel wat in Stellenbosch woonagtig was. Sy rede vir sy afwesigheid was dat hy die dag ander afspraak gehad het. Hierdie insident, asook die afwesigheid van die Jordaan-familie se teenwoordigheid tydens die genoemde optog het die navorser inspireer om ‘n genealogiese stamregister van die Jordaan-familie saam te stel

November 13, 2013

Die genealogiese register het 'n natuurlike groei getoon wat in Julie 2004 bykans die volledige Jordaan-genealogiese register in Suid-Afrika, Namibië en Zimbabwe verteenwoordig. Die Jordaan-genealogiese register verteenwoordig 32 933 individule name, 12 407 families, 5 162 plekname, 53 750 verskillende gebeurtenisse soos troues en geboortes. Nie minder nie as 450 bronne is gebruik om die inligting te bekom, bykans 600 e-posadresse, tussen 150 en 200 posadresse, terwyl ongeveer 150 faksnommers ook versamel is van persone wat inligting verskaf het. Hierdie statistiek sluit die bykans 3 500 vraelyste wat uitgestuur was uit. Die manuskrip beslaan 1 591 bladsye voor die finale afronding van die publikasie.

Met hierdie navorsing is beseft dat die opstel van 'n genealogiese register vir baie mense die alfa en omega van hulle familiegeskiedenis is, terwyl dit inderdaad nie regtig 'n bydrae op historiese gebied maak nie. ***Genealogie as hulpwetenskap tot die geskiedenis behoort deur die genealoë wat soveel tyd spandeer aan die opstel van genealogiese registers, opnuut beoordeel te word aan die hand van hulle bydrae op historiese vlak.***

Probleme wat opgeduik het tydens die navorsingstydperk van hierdie studie was dat van die bronne wat moontlik 'n bietjie meer lig op die twee Jourdan-broers se voorgeslagte in Frankryk en Duitsland kon werp, glad nie bekom kon word nie. Alle moontlike bronne-soektogte is ingespan om die inligting op te spoor, maar telkens sonder sukses. Die soektogte dui daarop dat die bronne moontlik in privaat besit in Europa is. 'n Wetenskaplike soektog het ook aangedui dat die bronne moontlik glad nie meer bestaan nie omdat van die bronne terugdateer na die sestiende en sewentiende eeu en waarskynlik in opdrag van 'n Jourdan-familielid in gesinsverband opgestel is. 'n Ander tendens tydens korrespondensie met die Waldensiese Museum in *Torre Pelicce* is dat geen korrespondensie in Engels beantwoord is nie. Daar was enkele bronne wat aangevra was deur die interlenings-afdeling van die Sasol-biblioteek wat net in die buiteland beskikbaar was en as gevolg van die kostefaktor nie bestel is nie. Die bronnetaal het gewissel tussen Engels, Frans en Italiaans. Tydens die navorser se besoek aan Europa is die kommunikasietempo bepaal deur die standaard van Engels wat gepraat en verstaan kon word deur die onderskeie persone wat besoek is en met wie onderhoude gevoer is. 'n Tydrowende aspek tydens besoeke aan veral die meesterskantore is, dat daar 'n beperking is ten opsigte van die hoeveelheid lêers wat daagliks aangevra kon

November 13, 2013

word. Die uiteenlopende standaard van diens by die verskillende meesterskantore maak dit moeilik om te glo dat 'n navorser met dieselfde staatsdepartement te make het. Dieselfde situasie is ter sprake by die Sasol-biblioteek wanneer tydskrifartikels aangevra word wat in die argiewe gestoor word. As besoekende doktorale student is hierdie reël by die Universiteite van Kaapstad en Stellenbosch positief aangepas.

Die verspreiding van die *Jourdan*-familie, en later bekend as die *Jordaan*-familie, vanaf Franschhoek het in verskeie windrigtings plaasgevind. Volgens die inligting wat bekom is tydens die opstel van die Jordaan-genealogiese register, het lede van die Jordaan-familie hulle benewens in Suid-Afrika, ook in ses ander Afrikalande gevestig, te wete Namibië (die voormalige Suidwes-Afrika), Zambië (die voormalike Noord Rhodesië), Zimbabwe (die voormalige Rhodesië), Kenia, Botswana (die voormalige Betsjoeanaland) en Swaziland. Kanada is die enigste land buite Afrika wat ook aangedui is as 'n plek van geboorte vir 'n lid van die Jordaan-familie. Die register dui onder meer aan waar lede van die Jordaan-familie gebore is en gesterf het. In die verslag oor plekname wat 408 bladsye beslaan, word 926 plekname aangedui waar lede van die Jordaan-familie gebore, gewoon en gesterf het. Hierdie verspreiding verteenwoordig groepe van minder as tien tot die grootste groep van 766 familieledes in een distrik of dorp. Hierdie navorsing is toegespits op 197 van die dorpe. Hierdie dorpe word uitgesonder omdat daar meer as tien lede van die Jordaan-familie in die dorpe aangeteken is. Die ses Afrikalande sal gesamentlik bespreek word.

Hierdie verslag dui ook verskeie sterftes aan in konsentrasiekampe gedurende die Anglo-Boereoorlog (1899-1902). Daar is een geval van 'n Jordaan wat in Vlaandere, (België,) gesterf het tydens die Eerste Wêreldoorlog (1914-1918). 'n Tweede Jordaan is tydens die Slag van Delvillebos in Noord-Frankryk oorlede. Sommige Jordaans se plek van sterfte word aangedui as 'n hospitaal vir persone met geestelike versteurings aan die Kaap. Een Jordaan-baba is op Robbeneiland gebore.

Die studie poog om 'n aanduiding te gee van hoe die onderskeie groepe van die Jordaan-familie vanaf Franschhoek na die res van Suid-Afrika versprei het. Hierdie aanduiding sal berus op natuurlike trekrigtings, asook vroegste datums van verskyning in elke distrik.

November 13, 2013

Tydens die ontleding van die trekrigtings, sowel as die eerste datum van verskyning van 'n lid van die Jordaan-familie in die onderskeie distrikte, was daar tien trekrigtings en tien tydgleuwe sedert die verspreiding begin het. Ná die Boland in 1688 het die Oos-Kaap in 1741, Wes-Kaap in 1749, Noord-Kaap in 1820, Natal in 1845, Vrystaat en Noordwes in 1849, Gauteng in 1853, Mpumalanga in 1856 en die Afrikalande sedert 1896 gevolg. Die verspreiding van die meeste Jordaan-familielede regoor Suid-Afrika was teen 1955 voltooi. 'n Aspek wat na vore kom tydens die verspreiding van lede van die Jordaan-familie, en spesifiek die drie bloedlyne soos dit aangedui word, is 'n duidelike aanduiding van die oneweredige verspreiding van die drie bloedlyne.

Hierdie studie dui die interdisiplinêre aard van die navorsing aan deur die historiese wetenskap en toerisme nader aan mekaar te bring in die vorm van 'n vennootskap met die daarstelling van voorstelle vir 'n kulturele erfenisroete. Die daarstel van die toeganklikheid van 'n roete is 'n platvorm vir die historiese wetenskap om op dinamiese wyse kontak te maak met die publiek wat dikwels afsydig teenoor die historiese wetenskap staan.

Die verskillende voorstelle beteken dat daar waarskynlik verskillende opinies oor die onderwerp sal wees. Daar sal moontlik ook verskillende interpretasies oor die onderwerp wees wat die diskoers sal stimuleer vir 'n groter debat. Uiteenlopende opinies beteken nie noodwendig dat daar 'n regte of verkeerde mening sal wees nie.

Ten slotte: daar word verskeie voorstelle gemaak vir verdere navorsingsprojekte in hierdie studieterrein.

Kritiese drempel vir die kulturele erfenisroete van die Jordaan-familie

November 13, 2013

Enigeiemand wat neerhalende opmerkings teenoor lede van die Jordaan-familie maak en wat afkomstig is van die Waldensiese, Hugenote en Protestantse agtergronde verstaan nie die geskiedenis van die familie nie. Vir die historikus is daar inligting beskikbaar oor die drie bewegings, maar terselfdertyd bestaan daar bykans geen inligting oor individuele families, onder meer die Jordaan-familie, se stryd om oorlewing as gelowige familie en gesinsmense nie.

Een van die doelwitte van die navorsing was om 'n historiese ontleding van die Jordaan-familie se genealogie te doen. Dit was ook nodig om 'n verband te kry tussen die geskiedenis, die kerkgeskiedenis, die Waldensers, die Jordaan-familie, hulle genealogie en die Hugenote. Hierdie verband is nou verweef met die geskiedenis van die Jordaan-familie en hulle koms na Suid-Afrika.

Die studie dui aan dat die Waldensiese, Hugenote en Protestantse ondersteuners in Europa nie teen die gesag van die koning en die staat gerebelleer het nie. Vir hulle het dit uitsluitlik gegaan oor hulle geloofsregte. Die koning en sy soldate het in die lig van die Waldensiese, Hugenote en Protestantse ondersteuners se opstand teen die Katolieke Kerk, alles in hulle vermoë gedoen om hulle te onderdruk in die hoop op totale oorgawe.

Die Waldensers het aanvanklik geen verzet as gevolg van hulle godsdienstige oortuiginge getoon teen die aanvalle nie en eers eeue later, na hulle ontmoeting met Calvyn, het hulle besluit om geweld met geweld te beantwoord. Hulle was 'n klein minderheidsgroep wat hoofsaaklik in die suide van Frankryk en die aangrensende dele van Italië gevestig was. Daar is verskeie getuïenisse oor hoe die Waldensers en die Hugenote vermoor is deur die koning se soldate. Hierdie suksesse vir die koning en sy ondersteuners moes hulle 'n valse hoop op sukses en oorwinning gegee het en het hulle waarskynlik aangemoedig om voort te gaan met die aanvalle.

Op die aanvanklike vraag watter invloed daar van die Waldensers uitgegaan het met die koms van die Hugenote, het die navorsing aan die lig gebring dat die Waldensiese beweging en die Hugenote twee afsonderlike bewegings was. Die Hugenote was, soos die Waldensers, nie

November 13, 2013

volgeling van die Rooms-Katolieke Kerk nie. Die Hugenote is waarskynlik geïnspireer deur die vasberadenheid van die Waldensers. Die Waldensers se invloed is ook vergestalt in die Hugenote tydens die samewerkingsooreenkoms tussen Calvyn en die Waldensiese beweging by Chanforam in die noordweste van Italië.

Dit moet ook nie uit die oog verloor word nie dat die voorsate van die Suid-Afrikaanse Jordaan-familie in die Luberon-vallei in Frankryk gewoon het, waar die bakermat van die Waldensers was, nadat hulle uit die Angrogna-valleie in noordwes Italië gevlug het. Hierdie is 'n belangrike onderskeid tussen die Hugenote as universum wat na Suid-Afrika gekom het, teenoor die klein getal Hugenote-families wat uit die Luberon-streek gekom het. Die dorp Cabrière in die Luberon-vallei, vanwaar die twee Jourdan-broers, Jean en Pierre, met hulle moeder, Martha, gevlug het, is in 1445 onder meer deur 'n voorsaot van hulle gestig. Die dorpie is later afgebrand en verwoes deur ondersteuners van die koning en is 50 jaar daarna as 'n teken van durf deur die Waldensers herbou en bestaan vandag steeds. Daar bestaan verskeie getuienisse van die teenwoordigheid van die Suid-Afrikaanse Jordaan-familie se voorsate aldaar.

Die koning en sy soldate was vir 'n kort tydperk suksesvol in die konteks van die Franse geskiedenis, maar onsuksesvol om die Waldensiese, Hugenote en Protestantse gelowe te ondermyn.

Die Waldensiese beweging bestaan vandag nog in Italië, Frankryk en verskeie lande regoor die wêreld. Protestantse kerke en gelowe bestaan tans in bykans al die lande regoor die wêreld. Die Protestantse gelowe is egter nog steeds 'n klein minderheid in Frankryk en Italië.

Bykans 300 jaar gelede het die Jourdan-broers en hulle moeder Frankryk verlaat weens die onmoontlike lewensomstandighede wat vir die Hugenote geskep is deur die koning van Frankryk. Die destydse Franse Keiser Napoleon het die vlugteling en hulle nasate wat hulle vaderland moes verlaat oor hulle godsdienstige oortuiging, terugverwelkom deur aan hulle burgerskap aan te bied. Dit is 'n aanduiding van hoe elke heerser op sy tyd sy eie politieke agenda gehad het en klem gelê het op hulle eie prioriteite. Meeste heersers se termyn het negatief geëindig. Eers was daar die behepthed met die Waldensiese en Hugenote-geloof, en

November 13, 2013

later Napoleon wat weer die godsdienstige vlugteling terugverwelkom het. Sy einde het gekom weens sy politieke ywer om Europa te verower.

Wanneer die geskiedenis ontleed word, word tot die slotsom gekom dat die burgers van 'n land soms die prys moet betaal van hulle staatshoof se politieke wil. Erger nog is dat politici nie graag uit die geskiedenis wil leer nie en dat die burgers van 'n land oor geslagte heen dikwels die vernedering moet ervaar.

Die oogmerk van die navorsing was ook om te bepaal of daar 'n goue draad loop tussen die geskiedenis van die Jordaan-familie, hulle genealogie en toerisme. Hierdie goue draad kan op die volgende wyse aangedui word. Tydens die bespreking oor die verspreiding van die lede van die Jordaan-familie het dit duidelik na vore gekom dat daar 'n oneweredige verspreiding in Suid-Afrika was ten opsigte van die drie bloedlyne. Die genealogiese register se statistiek is in ooreenstemming met die oneweredige verspreiding van die drie bloedlyne. Die drie bloedlyne word soos volg verteenwoordig: Jan 27,8%, Paul 6,2% en Louis 66%. Dit is 'n aanduiding van die Jordaan-nasate se presiese bloedlyn.

Die hipotese wat deur die navorsing beantwoord is, was of die Jordaan-familie enige rol in Suid-Afrika gespeel het. Hierdie vraag is beantwoord deur die aanduiding van die verskeidenheid plekname wat vandag bestaan wat dui op die teenwoordigheid van lede van die Jordaan-familie. Hierdie studie het aangedui dat die meeste van die bydraes deur lede van die Jordaan-familie op plaaslike vlak gelewer was. Daar is ook gepoog om die neiging te beantwoord dat daar meer bydraes op plaaslike vlak as op ander vlakke was.

Die studie wou ook 'n diskoers inisieer oor die toekomstige rol en impak wat die potensiele implementering van 'n kulturele erfenisroete vir die Jordaan-familie in die onderlinge gemeenskappe in Suid-Afrika tot gevolg kan hê. Die gevolgtrekkings wat hieruit gemaak word, behoort as 'n bloudruk te dien vir enige ander familie in Suid-Afrika wat dieselfde toekomsvisie deel oor hulle onderskeie families en dié se geskiedenis.

Hiermee word die hipotese ook beantwoord of die studie daarin sou kon slaag om 'n brug te bou tussen genealogie en toerisme. Die brug word gevorm deur die kombinasie van veral die

November 13, 2013

gekoppelde Jordaan-bloedlyne met die kulturele erfenisnalatenskap van lede van die Jordaan-familie. Die genealogie verpersoonlik die kulturele erfenisnalatenskap van die Jordaan-familie. Die aanbieding van die kombinasie van die kultuur, erfenis en genealogie van die Jordaan-familie maak die aanbod as toerismepakket vir die besoeker of toeris soveel meer aantreklik.

Tydens die bespreking van die beplanning van die kulturele erfenisroete is daar as onderbou van die beplanning lig gewerp op die ontwikkeling en volhoubaarheid van die roete. Daar is ook aandag gegee aan die omvang van drakrag tydens die beplanning van die roete en die gevolglike inrig van 'n interpretasiesentrum.

Die oorsprong van die kultuur- en erfenistoerisme is breedvoerig bespreek Die vraag wat nou gevra kan word, is of die Jordaan-familie saam met die geskiedenis gaan beweeg en hulle kulturele erfenisnalatenskap gaan uitbeeld in onder meer interpretasiesentra, en of die toekomstige geslagte verder verwyder gaan word van die kulturele erfenis-nalatenskap wat hierdie navorsing belig het?

Die uitgangspunt van hierdie navorsing is dat toekomstige geslagte van die Jordaan-familie nie verder verwyder behoort te raak van hulle kulturele erfenisnalatenskap nie en dat daar verkieslik aandag gegee behoort te word aan 'n toekomsvisie van die kulturele erfenisnalatenskap van die Jordaan-familie.

Die toekomsvisie vir lede van die Jordaan-familie behoort uit vier fasette te bestaan.

Die **eerste** moet gekoppel wees aan 'n internasionale en nasionale benadering ten opsigte van die kulturele erfenisnalatenskap van die Jordaan-familie. Voortvloeiend hieruit sal die geleentheid hom voordoen om temas en vertakkinge van die kulturele erfenisnalatenskap uit te beeld in die verskillende interpretasiesentra. Genealogiese byeenkomste en herdenkings wat tot nou toe meestal gebaseer is op huisgesinsvlak, waar die oupa en ouma met hulle kinders en kleinkinders byeenkomste reël, kan waarskynlik hierdeur 'n nuwe dimensie ontwikkel.

November 13, 2013

Hierdie nuwe dimensie kan moontlik 'n onderskeid tref tussen 'n *genealogiese byeenkoms* en 'n *genealogiese herdenking*. 'n Genealogiese byeenkoms kan dalk die geleentheid wees waar die drie- geslag gesins-familiebyeenkoms van toepassing is en die genealogiese herdenking die geleentheid sal wees waar daar meer klem op 'n spesifieke Jordaan-bloedlyn geplaas word.

Die **vierde** faset van die toekomsvisie oor die kulturele erfenisnalatenskap van die Jordaan-familie is die keuse in watter formaat die nalatenskap of gedeeltes daarvan aan die lede van die familie en ander belangstellendes aangebied behoort te word.

'n Voorgestelde inhoud oor elk van die vier fasette vir die toekomsvisie van die kulturele erfenisroete en -nalatenskap van die Jordaan-familie behoort sekere aspekte te behels. Hierdie is in aansluiting by een van die vrae wat gevra is, naamlik of dit moontlik is om uit die genealogie van die Jordaan-familie 'n toerismoeroute te vestig, en indien moontlik, hoe dit gedoen moet word.

Tydens die bespreking oor die ontstaan van kulturele- en erfenistoerisme, het dit duidelik navore gekom dat argeoloë en antropoloë in 'n groot mate betrokke was by die beginstadium van kulturele- en erfenistoerisme. Dit is ook argeoloë en antropoloë wat hoofsaaklik by die diskoers betrokke was oor wat *kultuur* en *erfenis* is. Die toerisme- komponent het sy oorsprong gehad toe die publiek in al hoe groter getalle historiese terreine begin besoek het. Suid-Afrikaanse historici het werklik eers in 2002 betrokke geraak by die diskoers oor die onderskeid tussen *erfenis* en *geskiedenis*. Hieruit kan daar dus afgelei word dat die totale benadering van 'n kulturele erfenisnalatenskap van die Jordaan-familie nie in afsondering deur genealoë hanteer kan word nie.

Hierdie benadering behels ook dat daar erken moet word dat daar waarskynlik ander families was wat saam met lede van die Jordaan-familie deelgeneem het aan die verspreiding van lede van dié familie in Suid-Afrika. Hierdie fenomeen kan van hulp wees tydens navorsing oor spesifieke gedeeltes van die geskiedenis van die Jordaan-familie.

November 13, 2013

Deur 'n groter betrokkenheid by lede van die Jordaan-familie en ander families in hulle onderskeie kulturele erfenisnalatenskappe kan daar bepaal word of die Suid-Afrikaanse wetgewing voldoende voorsiening maak vir die bewaring en instandhouding van individuele families se kulturele erfenisse in Suid-Afrika. Genealogiese navorsing *per se* is geen waarborg van die bewaring en instandhouding van enige kulturele erfenis- nalatenskap nie

'n Aspek wat tot voordeel van lede van die Jordaan-familie kan wees, al mag dit tot nadeel van sommige familieledes wees, is die finansiële situasie van 'n potensiële kultuur-erfenisroete in Suid-Afrika. Enige kostes met die instel van die roete kan waarskynlik beperk word tot 'n spesifieke groep Jordaan-familieledes wie se bloedlyn nou gekoppeld is. Die uitgawes sal oor die land versprei kan word waar lede van die betrokke bloedlyn ook reeds landwyd teenwoordig kan wees. Om die meulsteen van moontlike finansiële uitgawes te dek, kan die konsep van *Vriende van die Jordaan-familie* geïnisieer word. Hierdeur kan borgskappe, skenkings en dies meer geloods word.

Datums van historiese belang is onder meer die herdenking van die koms van die Hugenoote na Suid-Afrika in twee tydgleuwe, naamlik oor 3 jaar die 320-jarige, oor 33 jaar die 350-jarige en oor 88 jaar die 400-jarige herdenking. Daar kan nou al doelwitte gestel word met betrekking tot die vierings.

Die laaste gedagte ten opsigte van die internasionale en nasionale benadering is dié van die oprigting van standbeelde en monumente. Daar kan oorweeg word om in Europa en in Suid-Afrika 'n reeks standbeelde en/of monumente op te rig wat die beweging van die Jordaan-familie uitbeeld.

Die omgewing en streek waar 'n gedeelte van die kulturele erfenisroete aangebied word, sal bepaal of daar 'n spesifieke tema of vertakking van die geskiedenis van lede van die Jordaan-familie aangebied kan word. Sekere gedeeltes sal waarskynlik die klem laat val op verstedeliking, terwyl ander gedeeltes die nadruk sal plaas op oorlewing en die uitdagings van die tyd ten opsigte van die vervoermiddele wat tot die familieledes se beskikking was.

November 13, 2013

Die terrein kan 'n aanduiding gee van of daar 'n wandelpad uitgelê kan word wat maklik genoeg is vir alle lede van 'n gesin, en of die terrein homself leen vir die aanbied van 4x4-roetes wat tans baie gewild is. Die gedagte van 'n wandelpad en/of 4x4-roete is dat dit oor dieselfde terrein en roete behoort te strek as wat lede van die Jordaan-familie 100 of 200 jaar gelede moes beweeg. Afhangende van waar die moderne paaie en treinspore loop, kan 'n roete per trein of motor aangepak word. Tydens die aanbied van plaaslike feeste kan die roete ook bemark word deur middel van die aanbied van lugballon-ritte.

Tydens die beplanning van 'n wandelpad, 4x4-roete of die reël van plaaslike feeste deur die gemeenskap, kan aspekte soos die lewensomstandighede van 'n spesifieke tydvak uitgebeeld word, die kossoorte wat tot die mense se beskikking was en moontlik ook die gesinsituasie wat destyds gegeld het.

Landboupraktyke in verhouding met vandag se gevorderde tegniese omgewing, gemeenskaps- en landsake en die gevolge van aanhoudende trekgewoontes om watter rede ook al, behoort ook uitgelig te word. Meer nog: watter rol het die kommunikasiemetodes van 100 - 300 jaar gelede gehad op die verspreiding van lede van die Jordaan-familie? Hoe groot impak het die lewensomstandighede tydens die verspreidingsjare gehad op lede van die Jordaan-familie ten opsigte van trauma en emosie? Is daar ooit gevra hoekom die Jordaan-broers nie eerder die Rooms-Katolieke Kerk se geloof aangeneem het en derhalwe 'n beter en gemakliker lewe sou voer nie?

Daar bestaan die uitdaging aan lede van die Jordaan-familie om meer te wete te kom van hulle eie familieledes se lyding in byvoorbeeld die konsentrasiekampe van die Anglo-Boereoorlog. Die invloed en rol van lede van die familie in onderwysake, landbou en militêre aangeleenthede is ook belangrik. Daar is eweneens terreine soos musiek en kultuur wat nagevors behoort te word om die profiel van lede van die Jordaan-familie te bepaal.

Dit is van uiterste belang dat lede van die Jordaan-familie nie die eienskappe en verskillende vermoëns wat die Hugenote saam met hulle na Suid-Afrika gebring het uit die oog moet verloor nie. Tydens hierdie navorsing het daar verskeie insigte oor die twee Jourdan-broers na vore gekom. Lede van die familie moet hiervan kennis neem en tydens genealogiese byeenkomste

November 13, 2013

en herdenkings behoort hierdie eienskappe bespreek te word en met behulp van verdere navorsing bepaal te word hoe prominent en relevant die eienskappe vandag nog is.

Lede van die Jordaan-familie is in die unieke situasie dat hulle weet dat hulle almal een gemeenskaplike stamvader en moeder het. Uit die stampaar is die nageslagte van die Jordaan-familie deur drie broers voortgesit. Dit is om hierdie rede dat die onderskeie lede van die Jordaan-familie kennis behoort te neem van hulle onderskeie bloedlyne. Mense uit hierdie bloedlyne sou verskillende omgewingsomstandighede beleef het tydens hulle verspreidingsjare, wat waarskynlik weer verskillende genetiese eienskappe na vore sou laat kom het in die bloedlyne.

Tydens die beplanning van genealogiese byeenkomste en herdenkings wat moontlik aangebied kan word in die omgewing van 'n interpretasiesentrum, behoort daar aandag gegee te word aan die saamstel van 'n volledige stel lêers wat die volgende bevat: die titelaktes van lede van die Jordaan-familie op die roete ter sprake, testamente en 'n genealogiese register van die betrokke Jordaan-bloedlyn.

Dit sou raadsaam wees om die onderskeie besoekpunte ten opsigte van die Jordaan-familie met GPS-koördinate aan te dui. Hierdie metode van aanwysing skakel enige verwarring uit oor presies waar 'n terrein is.

Met die reël van 'n byeenkoms kan daar vroegtydig gereël word vir die besoek aan terreine en akkommodasie wat deur lede van die Jordaan-familie besoek sal word.

Tydens die ontwerp en beplanning van 'n interpretasiesentrum en die reël van 'n byeenkoms, kan daar ook aandag gegee word aan die herskepping van omstandighede tydens die koms of verblyf van enkele dae of langer op spesifieke plekke.

'n Aspek wat nie onderskat moet word tydens die reël van 'n byeenkoms en die inrig van 'n interpretasiesentrum in 'n landelike gebied nie, is die geleentheid wat geskep kan word vir een of meer geslagte van die Jordaan-familie om weer blootgestel te word aan landbou-aktiwiteite, veral vir diegene wat nie meer 'n oom of oupa het wat nog boer nie.

November 13, 2013

Daar behoort ook aandag gegee te word aan situasies waar die families net dogters gehad het en diegene wat opgeneem is in 'n familienaamgroep met 'n eerste of tweede naam van Jordaan. Aangenome kinders, grootmaakkinders en stiefkinders moet ook hulle regmatige plek in die familie beklee.

Spesiale verwysing na aspekte soos menslikheid, trots, sosiale omstandighede, bewustheid van geskiedenis, motivering vir die toekoms, persoonlike agtergrond en spesiale bande behoort op die agenda te wees van so 'n byeenkoms.

'n Oefening wat aangebied kan word tydens 'n byeenkoms, en waaroor daar in resente tye al hoe meer geskryf word, is die bepaling van iemand se afkoms of genetiese eienskappe deur middel van DNA-toetse. Hierdeur bestaan die moontlikheid ook om tydens 'n byeenkoms vergelykende opnames te maak tussen lede van die Jordaan-familie en DNA-toetse van beendere van Jordaaans wat opgegrawe is.

'n Verskynsel wat periodiek voorkom, is dat daar mense in Suid-Afrika woon wat die van *Jordan* of *Jordaan* dra, sonder dat hulle Jordaan-afstammeling is. 'n Voorbeeld hiervan is die huidige Minister van Kuns en Kultuur, dr Pallo Jordan. Sy pa was 'n sendeling in die Kroonstad-distrik gedurende die 1940's. Sy pa moes toe vir registrasiedoeleindes 'n van aanbied. Omdat hy 'n sendeling was, was hy van mening dat die van *Jordaan* afgelei van die *Jordaanrivier*, wat 'n gepaste keuse was.^[1]

Inhoudelik bied hierdie navorsing 'n groot verskeidenheid inligting oor die Jordaan-familie van Suid-Afrika. Die kritiese drempel vir die kulturele erfenisroete van die Jordaan-familie berus op die metodiek wat aangewend gaan word om die kulturele erfenisroete aan te bied en uit te beeld.

^[1] Dr. M. Buthelezi. 15-05-2003. Oorsprong van dr Jordan Ngubane se naam; Dr. Z Pallo Jordan. 13-05-2003. Oorsprong van sy van; <http://www.anc.org.za/people/jordan.html> 13-05-2003 Pallo Jordan; http://www.ufh.ac.za/collections/nahecs_faids.htm 21-05-2003. Universiteit van Fort Hare Argiewe: A.C. Jordan.

November 13, 2013

Moderne hulpmiddels soos videobande, DVD-skywe en 'n hoorspel kan gebruik word. Die gebruik van 'n interpretasiesentra, 'n museum, 'n begeleide toer met 'n goedgekeurde gids, 'n brosjure, 'n boek, 'n roman of biografie is enkele van die ander keuses.

Ten slotte dui die navorsing aan dat die Jordaan-familie na Suid-Afrika gekom het om 'n nuwe heenkome te begin in onbekende omstandighede. Lede van die Jourdan-familie het 'n bepaalde omstandigheid in hulle vaderland van die hand gewys om die uitdagings van 'n onontwikkelde land in die oë te staar, onwetend dat die eerste geslag Jourdan-kinders in Suid-Afrika nie net hulle vader sou verloor voordat hulle skool toe kon gaan nie, maar dat hulle later ook deur 'n stiefpa grootgemaak sou word.

Die nuwe uitdagings het bykans dieselfde opofferinge geverg wat hulle in Frankryk moes verduur. Ten spyte daarvan toon die talle plekname wat na lede van die Jordaan-familie verwys, dat dit 'n familie is wat nie geskroom het om te doen wat gedoen moet word vir 'n beter lewe nie. Dit is 'n groep mense wat verskeie familieledede gehad het wat hulle lewe op die spel geplaas het vir dit waarin hulle geglo het, sonder om aan 'n ander alternatief te dink of te oorweeg.

Barnard noem tydens die *J.B.M. Hertzog-gedenklesing* van die Suid-Afrikaanse Akademie vir Wetenskap en Kuns oor die onderwerp die *Afrikaner se Renaissance na die Anglo-Boereoorlog*

*... dat die verengelsingbeleid nie noodwendig beteken
het dat Afrikaans sou verdwyn nie. Die belangrikste
voorwaarde was egter dat vir sy behoud en voortbestaan
gestry moes word. Geen ander groep mense sou dit
doen nie ...*^[2]

Hierdie aanhaling kan deur lede van die Jordaan-familie ter harte geneem word, in dié mate dat die bewaring en instandhouding van die kulturele erfenis van die Jordaan-familie bepaal sal word deur lede van die familie.

^[2] 17-09-2004. Volksblad. ABO: Afrikaner se "Renaissance"

November 13, 2013

Wat verdere navorsing betref met verwysing na lede van die Jordaan-familie en hierdie studie as basis, kan drie voorstelle gemaak word. Eerstens, wat was die vloedgolf-effek op die eerste drie tot vier geslagte Jordaans in Suid-Afrika, in die lig van die Waldensiese, Hugenote en Protestantse agtergrond van hulle stamouers, Jean Jourdan, sy vrou Isabeau le Long en die broer Pierre Jourdan? Die tweede impliseer 'n omvattende studie oor die Jordaan-familie in Suid-Afrika tien geslagte na hulle stamvader en moeder se aankoms. Vrae soos die volgende is relevant: watter rol kan die Waldensiese, Hugenote en Protestantse agtergrond van die stamouers die volgende tien geslagte in Suid-Afrika speel? Het hierdie agtergrond 'n invloed op die emosionele en intelligensievlakke van die Jordaan-familie, asook 'n vergelykende DNA-studie tussen lede van die kontemporêre Jordaan-familie en hulle Europese stamouers? Die derde moontlikheid is om 'n vergelykende studie te onderneem oor die huidige lewensomstandighede van die Rooms-Katolieke lede van die Jourdan-familie in Europa teenoor dié van hulle Waldensiese, Hugenote en Protestantse familieledes wat na Suid-Afrika gekom het. Meer nog: Watter rol speel geloof in Suid-Afrika in die eerste dekade(s) van die 21ste eeu onder lede van die Jordaan-familie? 'n Vergelykende studie tussen Hugenote-families met Waldensiese agtergrond se verspreidingspatrone in Suid-Afrika moet dalk teenoor die Hugenote-families met geen Waldensiese agtergrond geplaas word.

Hierdie navorsing eindig met 'n toerisme-aanslag wat kan aansluit by die dissipline geskiedenis. Na die wete van die navorser is geen studie hieroor nog uitgevoer nie. Vars en innoverende voorstelle kan moontlik 'n mate van ongerief vir sekere historici teweegbring.

Hierdie proefskrif se onderwerp en inhoud kan 'n bydrae lewer tot die debat oor kulturele erfenistoerisme in Suid-Afrika. Dit kan 'n brug vorm tussen tradisionele geskiedenis en kulturele erfenistoerisme. Hierdie geleentheid behoort aangegryp te word deur sowel historici as toerismekundiges.

Op internasionale vlak behoort hierdie proefskrif ook impak te hê, aangesien daar verskeie ander families internasionaal sowel as nasionaal is wat dit as 'n bloudruk kan gebruik vir hulle eie omstandighede.

November 13, 2013

Die ploeg van hierdie braakland kan lei tot die koms van 'n groot getal toeriste na Suid-Afrika, wat uiteraard broodnodige buitelandse valuta na Suid-Afrika sal bring. Hierdie besoekers en toeriste sal aan 'n ander gedeelte van die Suid-Afrikaanse geskiedenis blootgestel word as die kontemporêre politieke debat van die regering van die dag. Die kulturele erfenisroete van die Jordaan-familie kan verskeie bande verstewig met buitelandse besoekers en moontlik ook buitelandse streeksregerings wat tot die besef mag kom dat daar op kulturele erfenisgebied meer in gemeen is as die voor- of afkeur van 'n politieke bestel.

OPSOMMING

Die Jordaan-familie: 'n historiese ontleding van hulle genealogie en die vestiging van 'n toerismoeroete.

deur

Marthinus Johannes Steyn Jordaan

Promotor : Prof. dr. S.L. Barnard
Mede Promotor : Prof. dr. O.J.O Ferreira
Departement : Geskiedenis
Fakulteit : Geesteswetenskappe
Universiteit : Vrystaat
Land : Suid-Afrika
Graad : Philosophiae Doctor

Die oorsprong van die naam Jordaan dateer terug na die skepping en die naam Jordaan as familienaam tot 970 nC. Hierdie studie analiseer die geskiedenis van die Jordaan-familie sedert die ontstaan van die familienaam Jordaan in die suidweste van Frankryk in die distrik Beziers, die koms van die twee Jourdan-broers na Suid-Afrika as deel van die Hugenote tot die

November 13, 2013

oneweredige verspreiding van die drie Jordaan-bloedlyne in Suid-Afrika en hulle verspreiding tot ongeveer 1955.

Die geskiedenis van die Jordaan-familie in Suid-Afrika kan slegs voldoende ontleed word deur die geskiedenis van die Waldensiese beweging, die ontstaan van die Hugenote en Protestantisme in Frankryk en ander lande in Europa, asook deur die geskiedenis van die VOC te hersien. Hierdie studie fokus op die deurlopende wisselwerking van aksies en reaksies tussen die Waldensiese en Hugenotebeweging aan die een kant en die Franse koning en die Rooms-Katolieke Kerk aan die ander kant. Die studie verduidelik hoe hierdie aksies en reaksies tot die uiteindelijke koms van die twee Jourdan-broers as deel van die Hugenote na Suid-Afrika in 1688 gelei het.

Die projek dui ook aan dat ten spyte van die groot lewensverlies onder lede van die Waldensiese beweging sedert die 12de -eeu, asook die Hugenotebeweging wat parallel met die sienings van Luther en Calvyn was, -die godsdienste bewegings vandag nog in verskeie wêrelddele bestaan. Die onderdrukking van die twee bewegings in veral Frankryk het tot 'n groot uittog van Franse burgers na verskillende wêrelddele gelei. Die uiteindelijke koms van die twee Jourdan-broers na Suid-Afrika sou onder meer 'n blywende indruk op hulle nageslagte en andere in Suid-Afrika laat. Ook in die onderskeie gemeenskappe waar lede van die Jordaan-familie woonagtig sou wees, is daar vandag nog getuienisse van hulle teenwoordigheid.

Sedert die koms van die twee Jourdan-broers in Suid-Afrika sou hulle saam met die ander Hugenote aan die Kaap 'n stryd voer teen die VOC-owerheid vir godsdienstige, onderwys- en ekonomiese regte in hulle nuwe omgewing. Hierdie studie dui aan wat die omstandighede van die Jourdan-broers was en wat hulle gedoen het om ekonomiese oorlewing te verseker.

Soos die getalle van die afstammeling van die stamouers, Jean Jourdan en Isabeau le Long, toeneem het, het die stelselmatige verspreiding van lede van die Jourdan-familie in Suid-Afrika begin. Die verspreiding begin in ongeveer 1741 en was teen 1955 bykans voltooi. Die studie dui aan hoe die verspreiding plaasgevind het en watter kulturele erfenis lede van die Jordaan-familie nagelaat het. Formules word gebruik om aan te dui wat die persentasie Hugenotebloed nog in die Jordaan-familie is.

November 13, 2013

‘n Kaart wat die verspreiding van lede van die Jordaan-familie aandui en ‘n kaart wat onder meer strate en ander plekke aandui wat na lede van die Jordaan-familie vernoem is, is ook geteken. Die verhouding tussen kulturele erfenistoerisme van die Jordaan-familie en die genealogie van die familie word ook bespreek.

Die diskoers oor die oorsprong van die begrippe kultuur, erfenis en kulturele erfenis word breedvoerig bespreek. Hierdie gedeelte bespreek verder die begrip kulturele erfenis toerisme wat ‘n nuwe konsep in Suid-Afrika is.

Die laaste gedeelte van hierdie studie bespreek die vereistes wat oorweeg behoort te word tydens die beplanning van ‘n kulturele erfenisroete vir die Jordaan-familie. Daar is verskeie faktore wat oorweeg behoort te word met die beplanning en oprigting sowel as inrigting van ‘n interpretasiesentrum op die aanbevole kulturele erfenisroete vir die Jordaan-familie.

Aan die hand van die wetgewing en ander bepalinge word daar ‘n voorgestelde model vir kulturele erfenis in Suid-Afrika voorgestel. Die beplanning van ‘n kulturele erfenisroete van die Jordaan-familie, wat insluit aspekte van volhoubaarheid, drakrag, die onderskeid tussen *toeris* en *pelgrim* en die vestiging van interpretasiesentra op strategiese plekke langs die roete, word bespreek.

Die verskillende voorstelle beteken dat daar waarskynlik uiteenlopende opinies oor die onderwerp sal wees. Daar sal moontlik ook verskillende interpretasies oor die onderwerp wees wat die diskoers sal stimuleer vir ‘n groter debat. Uiteenlopende opinies beteken nie dat daar noodwendig ‘n regte of verkeerde mening sal wees nie.

From: Marietjie van Zyl [<mailto:rietjies@gmail.com>]
Sent: Thursday, August 22, 2013 7:25 PM
To: navorsing@mjsjordan.co.za
Subject: Praatjie 9 September of 11 November

Goeie naand dr.Jordaan

November 13, 2013

My naam is Marietjie van Zyl, U buurman oor die straat se skoonsuster. Ons by die GGSA Vrystaattak het bogenoemde datums vir hierdie jaar oop vir 'n praatjie. Ons sal baie bly wees indien U een hiervan vir ons sal kan aanbied.

Indien U , u weg oopsien om een van hierdie datums met ons te kom gesels, het ons die volgende in gedagte:

Waar u belangstelling in genealogie vandaan kom en hoe dit gekom het dat die belangstelling tot 'n P.hD gelei het.

Is daar 'n verskil tussen genealogiese navorsing van die gewone persoon en die van 'n persoon wat dit doen vir 'n akademiese kwalifikasie?

Ek sal bly wees indien U my sal kan laat weet.

By voorbaat dank

Marietjie

ORIGINAL